



А Ж Р И М

(даъво аризани кўрмасдан қолдириш тўғрисида)

Фарғона шахри

2021 йил 8 февраль

4-1501-2101/206-сонли иш

Фарғона туманлараро иқтисодий судининг раиси А.Рахимов раислигида, судья ёрдамчиси Н.Эралиеванинг суд мажлиси котиблигида, даъвогар вакили Х.Шомирзаев (2021 йил 4 февралдаги рақамсиз ишончномага асосан) иштирокида, Ўзбекистон Савдо саноат палатаси Фарғона вилояти ҳудудий бошқармасининг даъвогар “Fergana-Oseana” МЧЖ шаклидаги хорижий корхонаси манфаатини кўзлаб жавобгар «Муҳаммадрасул замини» фермер хўжалигидан 13573380 сўм жарима ундириш тўғрисидаги даъво аризаси бўйича қўзғатилган иқтисодий ишни суд биносида, очиқ суд мажлисида кўриб чиқиб қуйидагиларни,

А Н И Қ Л А Д И :

Ўзбекистон Савдо саноат палатаси Фарғона вилояти ҳудудий бошқармаси даъвогар “Fergana-Oseana” МЧЖ шаклидаги хорижий корхонаси манфаатини кўзлаб судга даъво ариза билан мурожаат қилиб, жавобгар «Муҳаммадрасул замини» фермер хўжалигидан 13573380 сўм жарима ундиришни сўраган.

Палата ишни ўзининг иштирокисиз кўриб чиқишни сўраган.

Суд мажлисида даъвогар вакили судга ариза тақдим этиб, жавобгар билан жарима борасида ўзаро келишувга эришганликлари боис, даъво аризадан воз кечишларини баён қилди.

Жавобгар фермер хўжалигидан суд мажлисига вакил келмади. Жавобгарга суд ажрими почта орқали етказилган бўлиб, бу почта хабарномаси билан тасдиқланади.

Шу боис, суд ИПК 170-моддаси учинчи қисмига мувофиқ, ишни жавобгар вакиллари иштирокисиз кўриб чиқишни мумкин деб хулоса қилди.

Суд даъвогар вакилининг тушунтиришини тинглаб, иш ҳужжатларини ўрганиб чиқиб, далилларни текшириб, қуйидагиларга асосан даъво аризани кўрмасдан қолдиришни лозим топади.

Иш ҳужжатларига қараганда, даъвогар “Fergana-Oseana” МЧЖ шаклидаги хорижий корхонаси даъво аризасида жавобгар «Муҳаммадрасул замини» фермер хўжалиги билан 2019 йил 2 февраль куни FO/K-27-сонли контрактация шартномаси тузилганлигини, ушбу шартномага мувофиқ жавобгар даъвогарга 116100 кг пахта хомашёсини етказиб бериши лозим бўлганлигини, лекин жавобгар 10522 кг пахта хомашёсини етказиб бермаганлигини кўрсатиб, жавобгар ҳисобидан 13573380 сўм жарима ундиришни сўраган.

Бироқ, даъвогар асосланган контрактация шартномаси жавобгар билан эмас, балки бошқа “Муҳаммадрасул зиёси” фермер хўжалиги билан тузилган.

Даъвогар томонидан судга жавобгар фермер хўжалиги билан тузилган контрактация шартномаси тақдим этилмади.

Бироқ, даъвогар судга ариза тақдим этиб, унда жавобгар билан низони ўзаро келишув йўли билан ҳал этганликлари боис, даъводан воз кечишларини баён қилган.

Ўзбекистон Республикаси Иқтисодий процессуал кодексининг (кейинги матнларда ИПК деб юритилади) 107-моддаси биринчи қисми 8-бандига кўра, даъвогарнинг манфаатларини кўзлаб прокурор, давлат органи ва бошқа шахс томонидан тақдим этилган даъводан даъвогар воз кечган бўлса, суд даъво аризани кўрмасдан қолдиради.



ИПК 108-моддаси биринчи қисмида “Даъво аризасини кўрмасдан қолдириш тўғрисида суд ажрим чиқаради” деб белгиланган.

ИПК 157-моддаси иккинчи қисмида “Даъвогар ишни ҳар қандай инстанция судида кўришда тегишли суд инстанциясида ишни кўриш якуни бўйича чиқариладиган суд ҳужжати қабул қилингунига қадар даъводан тўлиқ ёки қисман воз кечишга ҳақли”, тўртинчи қисмида “Даъвонинг асосини ёки предметини ўзгартиришни, даъво талаблари микдорини кўпайтиришни ёки камайтиришни, даъвогарнинг даъводан тўлиқ ёки қисман воз кечишини қабул қилиш ҳақида ёхуд қабул қилишни рад этиш тўғрисида ажрим чиқарилади” деб белгилаб қўйилган.

Бу ҳолатда суд даъвогарнинг даъво талабидан воз кечиши қонун ҳужжатлари талабларига зид эмаслигини ҳамда бошқа шахсларнинг ҳуқуқ ва манфаатларига путур етказмаслигини, даъводан воз кечиш ҳақидаги ариза ваколатли шахс томонидан имзоланганлигини инобатга олиб, унинг даъводан воз кечишини қабул қилишни, ҳамда даъво аризани кўрмасдан қолдиришни, даъвогар ҳисобидан ишни судда кўриш билан боғлиқ 271467,60 сўм давлат божини бюджетга ундиришни, 17840 почта харажатини даъвогар зиммасида қолдиришни лозим топади.

Юқоридагиларга асосан, суд Ўзбекистон Республикаси Иқтисодий процессуал кодексининг 107, 108, 157, 195-моддаларини қўллаб,

А Ж Р И М Қ И Л Д И :

Даъвогар “Fergana-Oseana” МЧЖ шаклидаги хорижий корхонасининг даъводан воз кечиши қабул қилинсин.

Даъво ариза кўрмасдан қолдирилсин.

“Fergana-Oseana” МЧЖ шаклидаги хорижий корхонасидан Республика бюджети ҳамда Суд ҳокимияти органларини ривожлантириш жамғармасига 271467,60 сўм давлат божи ундирилсин.

17840 сўм почта харажати даъвогар “Fergana-Oseana” МЧЖ шаклидаги хорижий корхонаси зиммасида қолдирилсин.

Ажримдан норози тараф бир ой муддат ичида шу суд орқали Фарғона вилоят судига апелляция тартибида шикоят беришга ҳақли.

Раислик этувчи:

А.Х.Рахимов

Маъсул судья: Рахимов Акмал Хашимович

